



Sesida dals

10 d'october 2023

Communitgà ils

12 d'october 2023

Protocol nr.

769/2023

Dumonda Bischof

concernent la necessitad d'in lieu d'inscunter queer per giuvenils en il Grischun (en quest cas a Cuira) e la finanziaziun da quel per garantir sia cuntinuaziun ils proxims onns

Resposta da la Regenza

Las activitads da l'uniun sozialwerk.LGBTQ+ èn vastas. Ultra da la lavur averta cun uffants e giuvenils cun mintgamai in lieu d'inscunter da giuventetgna a Cuira ed a Buchs (SG), s'engascha l'uniun cun purschidas per la community queera, fa discurs da cussegliaziun e porscha plinavant offertas da furmaziun a scolas, ad instituziuns ed a firmas.

Tar la dumonda 1: La contribuziun da 3000 francs per onn (2024–2026) or dals meds finansials da la Promoziun da la sanadad e prevenziun tenor l'art. 7 al. 2 lit. c da la Lescha davart la protecziun da la sanadad en il chantun Grischun (Lescha da sanadad; DG 500.000) è vegnida concedida subsidiarmain a la contribuziun da la citad da Cuira che importa 10 000 francs. Ella serva sco contribuziun a la prevenziun simpla cunter suicidi e sco rinforzament da la sanadad psichica da las personas giuvnas en il Grischun che tschertgan il barat cun peers (persunas da la medema vegliadetgna e/u da las medemas ideas) davart la vita queera. Ina basa legala per ch'il chantun possia cofinanziar projects da la lavur cun uffants e cun giuvenils ch'èn specifics per la gruppa en mira, u custs da locaziun e salaris, n'exista dentant betg.

Tar la dumonda 2: cf. las explicaziuns tar la dumonda 3.

Tar la dumonda 3: Purschidas per giuvenils davart temas queers ston vegnir accumpagnadas laschond avert il resultat. L'adolescenza è la fasa d'empruvar ora e da chattar l'identitad. Normas e leschas duain e dastgan vegnir messas en dumonda.

Betg mintga giuvenil genderfluid è sco persuna creschida queer. Quest svilup vali d'accompagnar senza l'influenzar. Quai pretenda ina gronda cumpetenz professiunala. Per giuvenils en ina crisa datti gia purschidas da cussegliaziun en il Grischun. Questas purschidas vegnan garantidas dals Servetschs psichiatric dal Grischun (psichiatria d'uffants e da giuvenils). Ultra da quai ha l'uniun Agid grischun cunter AIDS integrà il champ d'acziun LGBTQ+ en sia strategia 2022–2027. Quest champ d'acziun s'occupa da la cussegliaziun, dal sustegn e da l'ulteriur svilup per tutgant temas relevants da la community LGBTQ+. L'Agid grischun cunter AIDS ha ina incarica da prestaziun da l'Uffizi da sanadad ed è vidlonder d'elavurar las purschidas en il champ d'acziun menziunà ensemen cun ils acturs relevants (jugend.gr, adebar, sozialwerk, e.u.v.) sco er da serrar las eventualas largias en las purschidas. Tras l'incarica da prestaziun existenta cun l'Agid grischun cunter AIDS po il chantun garantir la qualitat da las purschidas. Perquai n'èsi betg cunvegnent d'establiir purschidas e structurass parallelas. Ils departaments cumpetents (DES, DGSS) duain examinar, sch'igl è pussaivel da concentrar las purschidas e d'evitar structurass dublas da las organisaziuns menziunadas qua survant. E là, nua che quai necessari duain vegnir fatgas las adattaziuns respectivas.

Tar la dumonda 4: L'Agid grischun cunter AIDS fa ina instrucziun da la pedagogia sexuala davart temas LGBTQ+ en scolas ed en instituziuns. Questa purschida cumplettescha la purschida da la pedagogia sexuala per scolas che l'uniun adebar (post grischun da cussegliaziun per planisaziun da famiglia) offrescha. Ils purtaders da scola respectivs decidan la finala, sch'els vulan far diever da questas purschidas. Quai po avair per consequenza, che las purschidas da furmaziun sensibilas envers il tema gender na stattan betg a disposiziun en la medema dimensiun a tut ils uffants e giuvenils dal Grischun.



En num da la Regenza

Il president:

Peter Peyer

Il cancellier:

Daniel Spadin